


N° 52

# Plumailhon

## MAINATGES D'ÒC



Las marmòtas



La lagrema



Pasquale Paoli

35F (5,34 €)

ISSN 1264-6733

L

# La marmòta



**Es la prima e la montanha nauta es acaptada de nèu encara. Pus bas, los pendants començan de verdejar. Las primièras flors fan tornar las abelhas. Tot subte, un sibladís trauca aquel matin suau. Un pastre que sibla al can ? Non pas, es una marmòta !**



## Se mesfisan quand se desrevelhan

Las marmòtas son desrevelhadas. Tot l'ivèrn, an dormit plan al caud dins lor tuta. Tanlèu sortidas, començan d'espier çò que se passa a l'entorn. Tenon còr, que se vòlon assolidar que i a pas cap de perilh. L'ivèrn es estat long e las nòstras marmòtas son afamadas. Alara, per se repelhar, tot fa ventre : raices, èrbas mas tanben insèctes e vèrms. Mas n'í a una que ven de cridar gara en estiflant ! Èra un grop de caminaires. Ara son luènh. Las marmòtas agachan lo cèl, que i aja pas cap d'agla reiala en caça. Tot va plan e tornan partir en cèrca de mangisca.

## Naissença

A la fin de la prima, los pichons naixeràn. Las marmòtas son de mammifèrs. Pòdon far fins a sièis marmotons per portada. Quand naisson pesan trenta gramas. Demòran entre vint e quaranta jorns dins lo nis d'èrba seca al fons de la tuta. Tetaràn la maire tot aquel temps.

## Manjar fòrça per dormir longtemps

A la fin de l'estiu, las marmòtas fan pas que manjar. Vòlon engraiassar per poder ivernar. Son bravetas d'aquel temps, pòdon pesar fins a 8 quilòs. Amb la pelissa espessa qu'an, se pararàn del freg e poiràn esperar la prima venenta.



**Una marmòta adulta mesura de seissanta a ochanta centimètres ; pòt viure un vintenat d'ans. Las marmòtas vivon entre mila e tres mila mètres d'altitud dins los Pirenèus e dins lo Massís Central. Mas las poblacions pus importantas vivon dins los Alps.**

